

## REGLUGERÐ

### um skipun og verkefni rannsóknarnefndar, er hefur það hlutverk að bera kennsl á látna menn.

#### 1. Skipun nefndarinnar og skipulag.

- 1.1 Stjórnarfarslega heyrir nefndin undir rannsóknarlögreglu ríkisins.
- 1.2 Nefndina skipa fjórir menn, einn rannsóknarlögreglumaður, sem jafnframt er formaður, einn rannsóknarlögreglumaður úr tæknideild, einn réttarlæknir og einn tannlæknir.
- 1.3 Fyrir hvern nefndarmann skulu vera a.m.k. tveir varamenn. Við skipun varamanna fyrir réttarlækni og tannlækni skal taka tillit til landfræðilegrar staðsetningar þeirra, eftir því sem tæk eru á.
- 1.4 Að fenginni tillögu frá rannsóknarlögreglustjóra ríkisins, réttarlækniseild Læknaráðs og tannlæknadeildar Háskóla Íslands, skipar dómsmálaráðherra nefndarmenn og varamenn til þriggja ára.

#### 2. Verkefni nefndarinnar.

- 2.1 Nefndin skal leitast við að bera kennsl á menn, er margir hafa týnt lífi í flugslysi, skriðuföllum, snjóflóðum, flóði eða skipstapa eða öðrum náttúruhamförum, eða þegar óþekkt lík eða líkamsleifar finnast.
- 2.2 Við störf sín skal nefndin tryggja að gögn, sem finnast og geta haft þýðingu við að varpa ljósi á orsakir óhapps eða ábyrgð á óhappi, verði varðveitt.
- 2.3 Nefndin skal halda gerðabók um rannsóknir sínar. Í hana skal færa nákvæmlega allar niðurstöður.
- 2.4 Nefndinni ber að semja skýrslu um niðurstöður sínar. Þegar þær lúta að því að kennsl séu borin á einhvern, skal tilgreint á hvaða atriðum niðurstöðurnar séu byggðar.
- 2.5 Ríkissaksóknari getur gefið nánari fyrirmæli um það, hvenær einstök lögreglustjóraembætti skuli gera rannsóknarlögreglu ríkisins viðvart um mál, sem greinir í lið 2.1 og um samvinnu nefndarinnar og hlutaðeigandi lögreglustjóraembættis.

#### 3. Skipun nefndarinnar í einstöku máli.

- 3.1 Rannsóknarlögreglustjóri ákveður í samráði við hlutaðeigandi lögreglustjóra og formann nefndarinnar, hvort nefndin fullskipuð eða einstakir nefndarmenn taki þátt í rannsókn tiltekins máls.
- 3.2 Á sama hátt skal ákveða hvort kveðja skuli aðra sérfræðinga til.
- 3.3 Þegar ákvörðun er tekin samkvæmt lið 3.1 eða 3.2 skal leitast við, eftir því, sem tæk eru á, að kveðja til nefndarmenn frá þeim landshluta sem rannsókn fer fram í.

#### 4. Staður sem rannsókn fer fram á.

- 4.1 Rannsóknarlögreglustjóri ákveður að höfðu samráði við hlutaðeigandi lögreglustjóra og formann nefndarinnar hvort störf nefndarinnar skuli fara fram að nokkru eða öllu leyti á vettvangi eða annars staðar.
- 4.2 Ef rannsókn þarf að fara fram erlendis, að nokkru eða öllu leyti, þarf að leita ferðaheimildar hjá dómsmálaráðuneytinu með venjulegum hætti.

#### 5. Fundir nefndarmanna.

- 5.1 Nefndarmenn og staðgenglar þeirra skulu hið minnsta koma saman til fundar einu sinni á ári, þar sem þeir beri saman bækur sínar um helstu nýjungar í tækjabúnaði og

starfsaðferðum á þessu sviði. Á fundunum skal einnig ræða annað, er máli skiptir varðandi störf nefndarinnar.

- 5.2 Formaður skal sjá til þess að fundargerð verði rituð og rannsóknarlögreglu ríkisins sent eintak hennar.
- 5.3 Við lok hvers árs skal formaður taka saman greinargerð um störf nefndarinnar, er verði hluti af ársskýrslu rannsóknarlögreglu ríkisins.

## 6. **Kostnaður af störfum nefndarinnar.**

- 6.1 Ekki skal greiða lögreglumönnum, sem skipaðir eru í nefndina, sérstaklega fyrir störf þeirra.
- 6.2 Fyrir störf annarra nefndarmanna skal greiða þóknun samkvæmt gildandi töxtum fyrir sérfræðistörf. Þóknunin greiðist úr ríkissjóði samkvæmt venjulegum greiðsluskilmálum.
- 6.3 Ferðakostnaður vegna funda samkvæmt lið 5.1 og norrænna funda skal greiðast af rekstrarfé rannsóknarlögreglu ríkisins.

Reglugerð þessi, sem sett er samkvæmt heimild í 9. gr. laga nr. 108 28. desember 1976 um rannsóknarlögreglu ríkisins, staðfestist hér með til að öðlast gildi 1. október 1988.

*Dóms- og kirkjumálaráðuneytið, 6. september 1988.*

**Jón Sigurðsson.**

*Porsteinn Geirsson.*

15. september 1988

Nr. 434

## REGLUGERÐ

**um breytingu á reglugerð um slátrun, mat og meðferð sláturafurða  
nr. 188 6. apríl 1988.**

1. gr.

20. gr. orðist svo:

Svínakjöt.

Fitustig ákvarðast með tveimur mælingum, þ.e. minnsta fituþykkt á miðjum hrygg, mælt frá háþorni (F1) og mesta fituþykkt á herðum (F2).

Við kjötmat ber að greina svín í þrjá aðalflokka: grísi, gyltur og gelti, og merkja kjöt í hverjum þeirra sem hér segir:

1. Grísir.

Ung svín, geltir, sem vanaðir hafa verið innan 3ja mánaða aldurs, og gyltur sem ekki hafa gotið. Grísaskrokkar vegi að hámarki 85 kg og skiptast í fjóra flokka eftir þyngd og fitustigi. Fitustig ákvarðast með tveimur mælingum, þ.e. minnstu fituþykkt á miðjum hrygg (F1) og mestu fituþykkt á herðum (F2). Flokkarnir eru eftirfarandi:

GRÍS I\*: Skrokkar sem vega yfir 55 kg, hafa vel vöðvafyllt læri, F1 sé minna en 20 mm og F2 minna en 35 mm. Spiklag skal vera jafnt, þétt, fíngert og hvítt. Útlit skrokksins og verkun óaðfínanleg.

GRÍS I: Skrokkar sem vega yfir 36 kg, F1 sé minna en 20 mm og F2 minna en 38 mm. Spiklag skal vera jafnt, þétt, fíngert og hvítt. Útlit skrokksins og verkun góð. Krafa um vöðvafyllingu minni en í GRÍS I\*.